

FONDACIJA CURE

VIJESTI | Prvo izdanje

Januar – April 2024.

Dragi prijatelji/ce, saradnici/e i podržavatelji/ce,

Pozivamo vas da pročitate naš pregled aktivnosti i dostignuća ostvarenih tokom proteklih mjeseci. Od panel diskusija i edukacija do važnih susreta, ponosne smo što smo aktivno doprinosile zajednici i zagovarali za prava žena u Bosni i Hercegovini. Ovaj newsletter ističe naše nove projekte poput "Feminističkog vremeplova", istraživanja feminističkog pokreta te aktivnosti koje jačaju mrežu i podršku ženskim pravima. Također, fokusirale smo se na borbu protiv rodno zasnovanog nasilja kroz dva nova projekta za mlade.

Hvala vam što ste dio naše priče. Vaša podrška je ključna za naš uspjeh i zajedno možemo postići još mnogo toga.

Tim Fondacije CURE





Novi strateški plan za period 2024-2028

Ovaj plan je rezultat posvećenog rada i saradnje, a fokusira se na nekoliko ključnih oblasti koje smatramo prioritetnim za postizanje naše misije. Naš cilj je da kroz ovaj plan dodatno osnažimo žene, unaprijedimo njihova prava i stvorimo održive promjene u društvu. Strateški plan obuhvata sljedeće ciljeve:

- Jačanje glasova i prava žena kroz snažnu zagovaračku kampanju i pravnu reformu
- Promocija holističke sigurnosti i interseksionalnosti u akciji
- Osnaživanje žena kroz obrazovanje, mirovni aktivizam i političku participaciju
- Izgradnja kapaciteta i podržavanje održivog uticaja kroz saradnju i istraživanje bazirano na podacima.

Planiramo ostvariti naše strateške ciljeve kroz realizaciju sljedećih projekata u 2024. godini:

Istraživanje fragmentacije feminističkog pokreta u Bosni i Hercegovini

U 2024. godini, Fondacija CURE započela je novi ciklus saradnje sa Kvinna till Kvinna Fondacijom kroz projekt „Istraživanje fragmentacije feminističkog pokreta u Bosni i Hercegovini“. Ovaj projekt ima za cilj otvoriti diskusiju o različitim perspektivama i identitetima unutar ženskog i feminističkog pokreta u našoj zemlji, te definisati zajedničke vrijednosti koje nas ujedinjuju.

Kroz seriju razgovora s akterima/cama pokreta, istražujemo teme koje razdvajaju aktiviste/kinje za ženska prava i formuliramo zajedničke vrijednosti koje nas spajaju. Naša želja je otvoriti prostor za feminističke aktiviste/kinje kako bismo bolje razumjeli/e korijene nedostatka solidarnosti i empatije unutar pokreta, te pronašli načine kako da naše razlike pretvorimo u snagu.

U okviru projekta, 5. marta 2024. godine, organizovan je sastanak sa organizacijama iz drugih gradova u BiH u kojima se organizuju Osmomartovski marševe. Razmjenili/e smo informacije i prijedloge za saopštenje za štampu, te započeli pripreme za foto i video kampanju koju smo uspješno realizovale.

Takođe, 27. marta 2024. godine, organizovan je susret sa aktivistkinjama iz šire sarajevske regije, gdje smo diskutovale o važnim temama za Osmomartovski marš u Sarajevu.

Ovaj projekt će nam pomoći da prepoznamo pitanja koja nas okupljaju i pronađemo elemente zajedničkog djelovanja za boljšak svih nas.



Feministički vremeplov

Fondacija CURE započela je provedbu novog projekta „Feministički vremeplov“- Ovaj projekat traje od 1. januara do 31. decembra 2024. godine i nudi ženama potpuno novi koncept brige o sebi.

Kroz projekat, žene će imati priliku dijeliti svoje lične priče iz prošlosti i razgovarati o mehanizmima zaštite koje su koristile za očuvanje mentalnog i fizičkog zdravlja. U suradnji s psiholožima/ginjama, radićemo na suočavanju s problemima iz prošlosti, uključujući retrumatizaciju uzrokovana pandemijom COVID-a 19 i ratom u Ukrajini.

Posebnu pažnju posvetićemo mladim ženama u Bosni i Hercegovini koje pate od transgeneracijskog PTSP-a, a koji je često ignoriran. Ovaj projekat će ponuditi mehanizme za zaštitu mentalnog i fizičkog zdravlja žena, te će se raditi na prihvatanju trauma kroz psihološke procese.

Radujemo se što ćemo pružiti podršku i snagu ženama, pomažući im da prevaziđu izazove i izgrade bolje sutra.

Zajedno jače

Fondacija CURE provodi projekat „Zajedno jače“. Kroz institucionalnu podršku, posvećeni smo unaprjeđenju sigurnosti i jednakosti svih žena. Naš cilj je stvoriti okruženje u kojem će sveobuhvatna briga, informisano zagovaranje i održive promjene u zajednici postati stvarnost.

Osim rješavanja ključnih pitanja, prioritet nam je briga o sebi i dobrobit aktivistkinja, osiguravajući im podršku potrebnu za postizanje trajnih društvenih promjena. Kroz ovaj projekat, radimo na osnaživanju zajednice, promovisanju ravnopravnosti i stvaranju sigurnijeg okruženja za sve.



Jačanje kapaciteta Ženske mreže BiH

Projekat „Jačanje kapaciteta Ženske mreže BiH“ traje od 1. jula 2023. do 30. juna 2024. godine, i ima za cilj jačanje kapaciteta braniteljica ženskih prava iz Bosne i Hercegovine, kako bi postale nezamjenjive sudionice u svim pregovorima vezanim za kvalitet života u našoj zemlji.

Braniteljice ženskih prava igraju ključnu ulogu u pružanju socijalne podrške, nudeći usluge koje država ne može pružiti. Međutim, često nismo prisutne kada se raspravljaju važne teme niti imamo priliku iznijeti svoje slučajeve. Zbog smanjenog prostora za ženski aktivizam i nedostatka sredstava za ženske organizacije, braniteljice ženskih prava često nemaju priliku sudjelovati u važnim procesima poput UN Agende 2030 i UNSDG-a.

Kroz ovaj projekat, osiguraćemo tehničke mogućnosti za ženske organizacije i braniteljice ženskih prava kako bi stekle nova znanja i definirale perspektive o međunarodnim pitanjima koja direktno utiču na živote žena u našem lokalnom kontekstu. Nadamo se da ćemo uspostaviti nove kanale komunikacije s međunarodnim braniteljicama ženskih prava, proširiti našu mrežu na regionalnom i međunarodnom nivou, te aktivnije sudjelovati u izradi planova i programa koji će imati trajne učinke.

Jedan od ciljeva projekta je osigurati prostor – fizički i digitalni – za braniteljice ženskih prava, članice Ženske mreže BiH, kako bismo povećali našu javnu vidljivost i predstavili našu

perspektivu na pitanja koja utiču na žene i djevojke u našoj zemlji.

Kao dio aktivnosti vezanih za jačanje Ženske mreže BiH, 30. januara 2024. godine održan je sastanak pod nazivom „Sarajevska feminističko-aktivistička priča“ sa 20 aktivistkinja iz Sarajeva i šire regije. Cilj sastanka bio je otvaranje prostora za diskusiju i koordinaciju zajedničkih događaja na širem području Sarajeva, a koji se tiču feminističko-aktivističke perspektive na ženska prava, nasilje nad ženama, femicid i ekološka pitanja.

Također, u februaru 2024. godine, objavljen je interni poziv za aktivnosti organizacija članica u okviru mjeseca obilježavanja Međunarodnog dana žena – 8. marta. Koordinacioni odbor Ženske mreže BiH dodijelio je pet malih grantova u pojedinačnom iznosu od 500 KM.

Članice Ženske mreže BiH imale su priliku posjetiti i razmijeniti ideje sa Fondacijom Women to Women sa Malte od 24. do 27. marta 2024. Tokom posjete Malti, shvatile smo da se ta zemlja suočava s ozbiljnim izazovima vezanim za femicid, a Fondacija Women to Women aktivno radi na jačanju lokalnih kapaciteta za efikasnu borbu protiv nasilja. Vjerujemo da će direktno povezivanje i jačanje veza između nas i žena iz Malte podići nivo regionalnog umrežavanja u vezi s zagovaranjem prevencije svih oblika nasilja nad ženama.



Siguran prostor za mlade



U februaru 2024. godine, Fondacija CURE započela je provedbu projekta „Siguran prostor za mlade“, podržanog u okviru Regionalnog programa lokalne demokratije na Zapadnom Balkanu 2 (ReLOaD2).

Cilj projekta je osnažiti srednjoškolce/ke u općini Novo Sarajevo, potičući njihovo aktivno sudjelovanje i stvaranje sigurnog okruženja. Kroz aktivnosti poput radionica, online kampanja i filmskih projekcija, mlađi će steći osnovna znanja o vršnjačkom nasilju, cyberbullyingu i drugim oblicima nasilja i diskriminacije.

U prva dva mjeseca provedbe projekta održani su ključni implementacijski sastanci s predstavnicima UNDP-a, Općine Novo Sarajevo i predstavnica škola, a radionice su započele u aprilu. Upitnici koje su popunili učenici/e potvrdili su alarmantno stanje nasilja među mlađima.

U narednom periodu planirane su radionice u Ekonomskoj školi i Školi za drveni dizajn i okoliš.



Trening za trenerice, Igman, 22. – 24. 3. 2024.

Fondacija CURE, u saradnji s UNICEF-om Bosne i Hercegovine, provodi projekat "EmpowerHER". Ovaj šestomjesečni program, koji traje od februara do augusta 2024. godine, osmišljen je s ciljem edukacije i osnaživanja mladih djevojaka da prepoznaju i suprotstave se rodno zasnovanom nasilju te da svoje znanje prenesu kroz radionice u svojim zajednicama. Projekat je posebno značajan u ruralnim područjima BiH, gdje je tabu tema rodno zasnovanog nasilja često prisutna.

Od 22. do 24. marta 2024. godine, održan je Trening za trenerice (ToT) s 13 učesnicima iz Sarajeva, Mostara, Zenice, Tuzle i Prnjavora. Učesnice su kroz interaktivni pristup obradile ključne teme poput predrasuda, stereotipa, diskriminacije, vrsta nasilja, spola i roda, te digitalne sigurnosti. Nakon treninga, održana su dva online sastanka za dodatnu podršku u vođenju radionica.

Prve samostalne radionice održane su u Tuzli i Prnjavoru 19. aprila 2024. godine, sa 16 učesnika/ca, te u Zenici 30. aprila 2024. godine, sa 17 učesnika/ca. U nadolazećem periodu planirane su radionice u Mostaru, Zenici i Sarajevu.

Tijekom ToT treninga, učesnice su kreirale poruke za online kampanju. Prva poruka je objavljena 24. aprila na društvenim mrežama Fondacije CURE, dosegnuvši 690 korisnika/ca i 749 prikaza.

Ovaj projekat ima za cilj promovirati vrijednosti jednakosti, nediskriminacije i prava na siguran život, s posebnim fokusom na osnaživanje mladih žena kao liderica u borbi protiv rodno zasnovanog nasilja. Kroz ove aktivnosti, vjerujemo da ćemo postići dugoročno pozitivan uticaj na zajednicu, promovišući toleranciju, razumijevanje i poštovanje ljudskih prava.



Inicijativa Građanke za ustavne promjene

Fondacija CURE, u saradnji sa Helsinškim parlamentom građana Banja Luka, provodi projekat Inicijativa „Građanke za ustavne promjene V“. Ova inicijativa, započeta 2013. godine, ima za cilj promovisanje ustava Bosne i Hercegovine koji će osigurati veću zaštitu ljudskih prava i sloboda, sa posebnim fokusom na rodnu perspektivu.

Projekat traje od 1. februara do 31. decembra 2024. godine i okuplja aktiviste/kinje i organizacije iz cijele BiH. Njihov cilj je potaknuti sve građane/ke da koriste svoje znanje, energiju i

volju za saradnju kako bi doprinijeli ostvarivanju ciljeva inicijative.

Jedan od ključnih koraka ove inicijative je podnošenje žalbe Instituciji ombudsmana za ljudska prava Bosne i Hercegovine zbog nedostatka rodno osjetljivog jezika i uključivanja rodnih komponenti u Ustav BiH.

Ovaj projekat je korak naprijed ka stvaranju pravednijeg i ravnopravnijeg društva, te pozivamo sve građane/ke da se pridruže našim naporima i doprinesu ovoj važnoj inicijativi.

Pokret za rodnu pravednost u zemljama Zapadnog Balkana

Fondacija CURE, u partnerstvu s Global Fund for Women, provodi projekat „Pokret za rodnu pravednost u zemljama Zapadnog Balkana“. Ovaj projekat podržava Global Fund for Women kroz njihovu inicijativu za rodnu pravednost, koja se fokusira na podršku pokretima za prava žena kroz fleksibilno finansiranje i resurse za maksimalan uticaj i značajne promjene.

Global Fund for Women je započeo saradnju s pokretom za rodnu pravednost na Zapadnom Balkanu, kako bi podržao lokalne feminističke pokrete u suočavanju s izazovima koje donose antigenderski pokreti i stvaranje trajnih, značajnih društvenih promjena. Partnerstvo s Fondacijom CURE omogućava Global Fund for Women da efikasnije adresira regionalne probleme i ojača lokalne feminističke pokrete.



Posjeta Udruženja „Žena sa knjigom” iz Mostara



Enisa Bukvić i Lidija Sejdinović, predstavnice Udruženja „Žena sa knjigom” iz Mostara, posjetile su nas 16. januara ove godine. Razgovarale smo o saradnji i pripremama za drugi godišnji festival „Žena sa knjigom”, koji se održava u Mostaru, s ciljem promocije književnosti i umjetnosti među ženama.

Sastanak s predstavnicom francuske ambasade

Anaïs Girard, ataše za saradnju u francuskoj ambasadi u Sarajevu, posjetila je Fondaciju CURE. Razgovarale smo o mogućnostima saradnje i podrške za naše aktivnosti usmjerenе na rodnu ravnopravnost i prava žena.

Prezentacija Svjetske banke

Predstavnica Fondacije CURE učestvovala je 15. marta 2024. na prezentaciji Svjetske banke o Ekonomskom memorandumu za zemlju, te se uključila u panel raspravu o energetskoj tranziciji.

Susret s predstavicama Fondacije tuzlanske zajednice

28. februara 2024. godine, ugostile smo predstavnice Fondacije tuzlanske zajednice u našim prostorijama. Razgovarale smo o našim projektima i mogućnostima za buduću saradnju, naglašavajući važnost lokalne i regionalne povezanosti u ostvarivanju zajedničkih ciljeva.



Radni sastanak na Trebeviću / Susret sa mladima iz Švedske

Radni sastanak na Trebeviću

22. i 23. februara predstavnice Fondacije CURE sudjelovale su na radnom sastanku na Trebeviću, u organizaciji švedske feminističke fondacije Kvinna till Kvinna i Media centra Sarajevo. Razmatrale smo porast femicida, sužavanje prostora za novinarsko i aktivističko djelovanje, te strategije za zajedničku reakciju na negativne društvene pojave

Trening o zaštiti novinarki od online prijetnji

U Mostaru je 27. marta održan trening u organizaciji BH Novinara o zaštiti novinarki od online prijetnji. Fokus je bio na pravnim i institucionalnim okvirima za borbu protiv online nasilja, rodno zasnovanog nasilja, te drugih oblika cyber kriminala.

Posjeta studenata/ica iz Švedske

U januaru smo ugostile švedske studente/ice Global Collegea u sklopu razmjene koju je organizirao Institut za razvoj mladih KULT. Raspravljali smo o ekonomskom osnaživanju žena, politikama rodiljskog dopusta, razlozima za odlazak mladih iz zemlje, te porastu desničarskih pokreta u Bosni i Hercegovini.



Posjeta Udruženju žena JADAR Konjević Polje

Početkom godine sudjelovale smo u aktivnosti pripreme četenje, okupljajući preko stotinu žena iz cijele bivše Jugoslavije kako bismo zajedno sačuvali tradicionalnu bosansku poslasticu od zaborava.

Komemoracija u Bijeljini

20. janura prisustvovali smo komemoraciji i otkrivanju spomenika drvoredu posvećenog migrantima, nestalim i poginulim na našim prirodnim granicama. Ovaj emotivan događaj na malom gradskom groblju u Bijeljini podsjetio nas je na važnost solidarnosti i ljubavi u teškim trenucima.

Sastanak s UN Women

Početkom februara, imale smo priliku susresti se s predstavnicama UN Women za BiH, Jo-Anne Bishop, Editom Miftari i Mersihom Zulčić. Razmijenile smo iskustva i ideje te dogovorile potencijalnu saradnju na projektima kao što su osmomartovske aktivnosti, PitchWise festival ženske umjetnosti i aktivizma te aktivnosti u sklopu Globalne kampanje 16 dana aktivizma protiv rodno zasnovanog nasilja.

Konjević polje, zajedničko kuhanje / Bijeljina, sjećanje na migrante / Sarajevo, sastanak sa UN Women





Javna prezentacija filma i knjige „Ženski sud – slučaj Foča“

Prisustvovali smo ovom značajnom događaju u organizaciji Žena u crnom i Autonomnog ženskog centra, uz podršku feminističkih grupa iz BiH (Horizonti, Tuzla, Fondacija CURE, Sarajevo), Crne Gore (Centar za žensko i mirovno obrazovanje – Anima, Kotor), Hrvatske (Centar za žene žrtve rata, Zagreb), te umjetničko-aktivističkih kolektiva iz Beograda i Novog Sada. Nakon prikazivanja filma, organiziran je razgovor s preživjelima i aktivistkinjama.

Edukativni program o seksualnom nasilju u ratovima

U februaru 2024., sudjelovale smo u Edukativnom programu pod nazivom „Feministički pristup problemu seksualnog nasilja u ratovima u Jugoslaviji: Za kulturu sjećanja i odgovornosti“. Program je organiziran u saradnji sa Ženama u crnom i Autonomnim ženskim centrom, te je obuhvatio važne teme o sistemskom seksualnom nasilju koje su žene doživjele na kraju 20. stoljeća. S ciljem podizanja svijesti i osnaživanja žrtava, program je naglasio važnost kulture sjećanja i odgovornosti za prevenciju budućih zločina.

Predstavljanje rada na Forumu mladih Naše stranke

Na poziv Foruma mladih Naše stranke, 13. februara 2024. godine, predstavnica Fondacije CURE predstavila je naš rad. Fokus je bio na problemu femicida u Bosni i Hercegovini, te na našim aktivnostima usmjerenim prema zaštiti ženskih prava i promicanju društvene jednakosti.

Beograd, projekcija filma Ženski sud - Slučaj Foča / Radmilovci, edukativna radionica





Protesti u Beogradu

24. februara 2024. godine sudjelovale smo na protestima u Beogradu, povodom obilježavanja početka agresije na Ukrajinu i rata u Gazi. Naše prisustvo podržava solidarnost i poziva na mir u svim konfliktima.

Strateško planiranje u Konjicu

Od 6. do 7. marta 2024. godine prisustvovali smo strateškom planiranju Inicijative za monitoring evropskih integracija BiH u Konjicu, gdje smo radile na razvijanju strategija za unaprjeđenje evropskih integracija naše zemlje.

Donacija za djevojke iz SOS dječijeg sela

Predale smo donaciju predstavnicama INFO Skripta namijenjenu za podršku djevojkama koje napuštaju SOS dječije selo kako bi započele samostalan život.

Panel diskusija u Zenici

Prisustvovali smo panel diskusiji u Zenici na poziv udruženja *Naša djeca*. Fokus cijelog događaja bio je na borbi protiv nasilja nad ženama.

Protesti u Beogradu / Donacija za djevojke iz SOS dječijeg sela, Sarajevo, mart 2024.





Predavanje na Medicinskom fakultetu u Sarajevu

9. marta 2024. godine, na poziv Emine Šehić iz InciSiN BiH, održale smo predavanje na događaju „Žena si, nasilje nije tvoja priča“ u amfiteatru Medicinskog fakulteta UNSA. Predstavile smo naš rad i važnost osnaživanja žena, naglašavajući kako konkretan osobni doprinos može mijenjati stanje u bh. društву.

Sudjelovanje na događaju B&H WBF Chairmanship

Sudjelovale smo na događaju *B&H WBF Chairmanship in Office* u Ministarstvu inostranih poslova u Sarajevu, gdje smo raspravljale o važnim temama za regiju.

Konferencija za medije i projekt „Ženski karavan za pravdu i pomirenje“

27. marta 2024. godine u Sarajevu, prisustvovale smo konferenciji za medije tokom koje je predstavljena inicijativa „Ženski karavan za pravdu i pomirenje“. Projekt je osmišljen kako bi povećao vidljivost i uključenost žena u procese suočavanja s prošlošću i promociju krivične pravde.

Dan narcisa u Sarajevu

Posjeta studenta iz Kine

30. marta 2024. godine, pridružile smo se manifestaciji Dan narcisa Udruženja „Renesansa“ ispred Katedrale u Sarajevu, podržavajući borbu protiv raka dojke.

Ugostile smo studenta iz Kine, Fushua Wanga. Tokom svoje posjete Bosni i Hercegovini, Fushuo je imao priliku upoznati nekoliko organizacija i razgovarati s građanima/kama, te je podijelio svoje dojmove o ljepoti naše zemlje i nedostatku optimizma.

Ostali događaji i aktivnosti

Učestvovale smo na konsultativnim sastancima Ministarstva za ljudska prava BiH, treningu o korištenju socijalnih mreža u promociji rada OCD-a, regionalnoj konferenciji „Sve smo mi heroine“ i događaju UN Women o ekonomiji njege i brige.



Sudjelovanje na događaju B&H WBF Chairmanship



Predavanje na Medicinskom fakultetu u Sarajevu



Konferencija za medije i projekt „Ženski karavan za pravdu i pomirenje“





Marš za 8. mart u Sarajevu



U 2024. godini, Fondacija CURE organizirala je marš za 8. mart u Sarajevu. Na ovom maršu, aktivistkinje, feministkinje i svi/e saveznici/e, stali/e su zajedno na liniji otpora protiv diskriminacije, nasilja, ratova i siromaštva.

„Ja, aktivistkinja, feministkinja, stojim na liniji otpora. Otpora protiv opresije patrijarhata, mržnje, diskriminacije, nasilja i ratova. Stojim protiv patrijarhalnog sistema svim svojim bićem i tijelom,” poručile su aktivistkinje Fondacije CURE.

Na maršu su istaknule važnost zajedničkog djelovanja i solidarnosti, naglašavajući da je kultura sjećanja i odgovornosti ključna za izgradnju pravednijeg društva.



Javno reagovanje Ženske mreže BiH: KADA ONI KOJI ZAKON ŠTITE KRENU DA UBIJAJU ŽENE – ŠTA SMO MI ONDA DRŽAVI?!

Ženska mreža BiH izrazila je ogorčenost povodom ubistva žene 7. februara 2024. godine u Tuzli, koje je počinio policijski službenik koristeći službeno vatreno oružje. U svojoj javnoj reakciji, Ženska mreža BiH ističe kako je ovaj tragični događaj još jedan pokazatelj nesigurnosti i neodgovornog ponašanja institucija prema ženama.

Prošlo je šest mjeseci od ubistva N.Z. u Gračanici, a odgovorne institucije još uvijek nisu javno predstavile mjere poduzete kako bi se sprječila nova ubistva žena. Ženska mreža BiH zahtijeva hitnu i temeljnu reviziju zakona i prakse u vezi s kontrolom vatrenog oružja, naročito među državnim službenicima, te dosljednu provedbu zakona o oružju i municiji.

Naglašavajući potrebu za sigurnijim javnim prostorima i strožom kontrolom naoružanja, Ženska mreža BiH poziva vlasti na svim nivoima da preduzmu odgovarajuće mjere kako bi se osiguralo sigurno okruženje za sve građanke i građane. Također, zahtijevaju razvoj lokalnih sigurnosnih politika i uključivanje civilnog sektora u nadzor nad sigurnosnim agencijama.

Za više informacija, posjetite <https://zenskamreza.ba> ili kontaktirajte na info@zenskamreza.ba.

PRATITE NAS I PRIKLJUČITE NAM SE!

www.fondacijacure.org

 fondacijacure/ |  Fondacija CURE |  @fondacijacure

HVALA DONATORIMA I DONATORKAMA!

Global Fund for Women (GFW); Fondacija TRAG/Fondacija OAK; Sigrid Rausing Trust; Women's World Day of Prayer (WWDP) - German Committee; Western Balkans Fund; Kvinna till Kvinna (KTK)/Helsinki Committee For Human Rights; Heart and Hurt Found; UNICEF; EU, UNDP, Općina Novo Sarajevo

Molimo da nam pišete na info@fondacijacure.org ako želite da vas dodamo na CURE listu ili ako želite više informacija o našim akcijama i inicijativama.

 +387 33 207 561

 Dolina 1
71 000 Sarajevo, BiH

 info@fondacijacure.org